

Patipatia le tautua



PUNIALAVAA: Tauia ma patipatia le tautua ua afu mo Samoa i Niu Sila ma le lalolagi. Le susuga a le faifeau ia Lale ma le faletua ia Vini Peteru, ma nisi o alo sa molimau i le po o le Tavaga o Musika a le Pasefika (PMA). E feagai Vini ma Tapaga i le atoai foi o le 50 tausaga le tautua e ala i fatuga o musika e sufi ai le agaga pe a mafatia pe faagaetia foi, ma saga 'oa ai la tatou gagana. Malo fai o le faiva. Ata Punialavaa Facebook



AMATA I LE LOTU: O le talitonuga a Samoa e manuia se faamoemoe pe a amata i le Atua ma faai i le Atua. E pei foi o le faamoemoe o le Vaiaso o le Gagana 2018, na taulamua ai taulaga tetele a Niu Sila i lona faatauina. I le ata i luga sui o le sauniga a Kalaietete sa molia laau i Fogaa aua le vaiaso taupoina. O le afioga ia Patele Paulo Filoalii sa ta'ita'i, lauga le susuga i le faifeau ia Faafetai Vaoga, lagolago le susuga ia Makesi Alatu; a o le fanau sa faitauina le Tusi Paia ma molia talosaga. O le sauniga e taulamua ai le faalapotopotoga a le FAGASA i ona lala ta'itasi i le faamaopoopoga. Matua o le lauga, E iloa oe i lau gagana, e fesoata'i ma le autu o le Vaiaso, Alofa. E gagana le alofa e alofa le gagana e le faigata ona iloa i fetalaiga ma saunoaga. O le fe'au lea mo le fanau e fatufatu ai sootaga lelei ma isi i totonu o a'oga ma soo se nofoaga.

O le a sou taofi i le manulauti o le Vaiaso o le Gagana?

Aliimuamua Sia Batchelor
Avonhead, Kalaietete
Faia'oga



O tu ia ma aga a le Samoa ua masani ai. A fai sou fa'alavelave e fesoasoani mai le aiga potopoto, o uo ma e masani. Pe le masani ae ua masani lava e pulupululima fa'atasi e pei se aiga e tasi. A tupu fo'i se fa'alavelave o sa ta uo e 'ave fo'i iai le fesoasoani. O le mea lea fai mai ai isi papalagi "E 'ese le fiafia i le tu lea a Samoa o le loto fesoasoani".

Ua fetui lava lona faaogaga i tautalaga a le fanau, aua e le malamalama latou po'o le a le mea e ave uma ai tupe i fa'alavelave ae leai ni lavalava aoga po'o ni se'evae fo'i. O le itu lena e le lelei ai ona o le a tele le alofa atu. Tatau lava ona fuafua ne'i leai se mea 'ai a nai tamaiti. O le isi itu ua matele tatou i le 'ave ona toe fa'atitilo lea i se mea e toe aumai. E le o le uiga lena. Ae ua malamalama le 'autu. "Alofa atu nei, Alofa mai taeao; A fai sou fa'alavelave e o mai lava nai ou tau aiga e fesoasoani mai. E fa'apena fo'i pea fai ni o latou fa'alavelave.

Tatou te o lava po'o le a le itiiti ae ia tau ane ai. Ia ae ua iai fo'i isi milosaga i le uiga e lafo ai upu, Po'o mata lava o ai?

Atonu o lena e ofi mai ai le fesoasoani a le tala lelei, ia tineia lea uiga vaivai ua ave ma ila o le aganuu, ma faapea ona mumusu ai le fanau e auai. Alofa moni e le toe faatitilo i se tau.

Paula Sami Tauati
Aranui, Kalaietete
Tiakono, Tamā o le Aiga



O le isi foi lea faaupuga o le muagagana faa Samoa o le avatu ni lo aumai ni lo.

Tusa lava pe avatu le suamamoe i le tuaoi a o le suamamoe foi la latou kuka, e aumai lava.

E le o le tutusa o mea tausami le uiga o le upu a o le agaga e faatino ai le osiosiga lea. Vagana foi ua misa ona le toe feavea'ia lea o ni mea. Ae le fai a'i, e alu

alu foi aso toe tafa le finagalo, e toe faalelei lava e le suamamoe le va fealoa'i. Ona toe fetautalaa'i foi lea.

A fealofani le aumatutua ua fealofani foi fanau.

I Niu Sila nei ua tatou taumafai lava e faaolaola lea agaga, auā o le agaga lea e tu ai luga la tatou tu ma le agaifanua. O lou tuaoi ua le na o lou aiga a o lou uso tiakono ma lou auaiga i le ekalesia.

E ui lava ina fai mai nisi ua soona fai le alofa, ae o i le tagata lava ia le fuafua tatau e tusa i le malosi o le faasoa mai lea taimi i lea taimi.

E tele le sao o le lotu ma le tala lelei i le faatalaleiina o la tatou aganuu. Ua sui malie ai le uiga ma le faatinoga o le alofa; mai le faatitilo i se tau e toe aumai ae fai ona o le alofa moni.

Fai le galuega ma le faamaoni auā e tele auala a le Alii e faamanuia mai ai i le tagata e moni mea e fai. O si a'u faasoa lea. Manuia le vaiaso o le gagana.

Ripoti o le Vaiaso:

Fiafia pea fanau e atia'e tomai lauga i Kalaiesetete

Na faatumulia le fale mafuta a le kolisi o Riccarton i le po o le Aso Lua na se'i mavae.

O le tauvaga lauga a fanau a'oga Pasefika sa fai ai i lenei tausaga, lea ua faaigoa ia Aneriueta (Teta) Pao-Sopoaga, e manatua ai lea faia'oga sa iloga sona sao i le tautuaina o fanau Pasefika i Kalaiesetete.

O le tauvaga lenei a le SpacPac e faapito i le tapulaa maualuga o kolisi; ma na atoina le fale Pasefika i le tauvaga, e faa'oga ai gagana uma a le Pasefika.

E oo ia Tuvalu ma Kiripati sa faitaulia foi e ala i ni o latou sui.

E lua vaega sa vaevae i ai le tauvaga, o le 'aulaiti (juniors) ma le 'aumatutua (seniors).

I le itu a Samoa e ta'i 10 le aofa'i o suitauva i vaega e lua.

Sa filifilia le autu a le vaiaso o le gagana e fai ma matua o le tauvaga.

Sa matauina le maualuga o le tapenaga a fanau tauva. I le o lea e lei faigofie le galuega a faamasino

Na atagia le tauvai lelei o finau a



MALO LE TAOFI MA LE LOTOTELE: O sui tauva nei a Samoa o le vaega Matutua i le Samoa & Igilisi

sui i le ta'ito'alua e tutusa i tulaga togia e tolu.

Molimau ta'ita'i o le tauvaga i le tulaga sololelei o lenei faamoemoe, o loo matauina pea le naunau o fanau e auai aemaise matua.

O nisi o sui sa mautulaga i le tauvaga lenei o le a auai foi i le tauvaga a le FAGASA o loo ua atofa i se taimi e le o

toe mamao. E iai nisi o i latou e ono toe filifilia e fai ma sui o Kalaiesetete i le tauvaga aoao a le FAGASA i Ueligitone.

O le matua a susuga i faifeau sa talosiaina le faamoemoe, o le fua sa e lulu atu e toe fuaina mai ia te oe (*what you reap is what you sow*).

O le 2018 lena, ae sauni maia le 2019.

Nisi o vaaiga i ata i le po o le Spac Pasefika i Riccarton



Faasoā o le Vaiaso: Tui Atua

Ierusalemā e, afai e galo oe ia te a'u, ia galo lava i lo'u lima taumatau . . .

TATOU te faafetaia le alofa o le Atua ua tatou aulia mai leni taeao i le soifua laulelei.

Faafetai i le Ta'ita'i o le Sauniga Lotu ua muamua le taulaga i Matautu-aai e sufi le Atua i lona alofa ma lana pule faasoā.

Faafetaia fo'i le alii Kovana ma le Sui Kovana ma le faigamalo a Amelika Samoa ona ua lautogia a'u e fai se upu i leni taeao faitauina o le Malo ma tagata o Amelika Samoa.

E lē lau maua avanoa faapenei e lauga ai ia se Sui o se isi Malo i aso faapitoa o le isi Malo. Ma o le mea fo'i lea ou te lē utuvai tofo ai i leni faaaloalo maualuga,

Fai mai le lauga a se tasi Tamā o le atunuu, "Samoa, sa ou asiasi i le tulu'iga o Lagī ma Sa Lefē'e e samo ai se faalumaga auā le taeao leni". Sa ou samo i le Tusi Paia ma o loo fai mai le Salamo 137: 5-6:

"Ierusalemā e, afai e galo oe ia te a'u, Ia galo lava i lo'u lima taumatau; Afai ou te lē manatua oe, Ia pipii a'e lo'u laulaufaiva i lo'u gutu, Pe a lē faasili Ierusalemā i mea uma ou te fiafia i ai."

O le fesili, o ai Ierusalemā? O Ierusalemā o le nuu, o le tofi, o le 'ele'ele, o le tua'oi, o le tala faasolopito, o le tu ma le aga, o le gagana. Le gagana lea fai mai le faitau a le Tusi Paia, "afai ou te lē manatua oe, ia pipii a'e lo'u laulaufaiva i lo'u gutu".

E matuiā le faa'upuga, "pe a ou lē manatua oe, pe a le faasili Ierusalemā i mea uma ou te fiafia i ai, ia pipii a'e lo'u laulaufaiva i lo'u gutu" aua o le uiga, ia fano le gagana ma ia lafoa'i le fe'au e limata'ta'iina ai le mafaufau ma le agaga.

Mai fea le fe'au? Mai Lē afua mai ai le tofi ma le faasinomaga – na te momoli mai le fe'au i le mafaufau ma le agaga ona faaali lea e le laulaufaiva.

O la e fai mai le Tusi Paia na talanoa mai le Atua iā Atamu ma Eva, talanoa mai le Atua iā Aperamo, talanoa mai le Atua iā Mose – i le ā le gagana? I le gagana Eperu.

E manino mai, e fia talanoa le Atua i tagata Eperu i le gagana Eperu. E fia talanoa le Atua i tagata Maori i le gagana Maori. E fia talanoa le Atua i tagata Samoa i le gagana Samoa. Aua o lana meaalofa totino lea i atunuu ta'itasi ma ona tagata.

Ae faapefea le laufanua? Ae a la e fai mai mātua, "o Samoa e pau mai Saua pau mai Analega".

E 'anoa le laufanua pe afai e te iloa le tofi ma le faasinomaga o le laufanua, pe afai e te iloa le 'ele'ele faapea ai ma lona tua'oi.

Atili ona faamautūina le tofi, le faasinomaga ma le tua'oi, ona e mātua ona faaigoā le 'ele'ele o le fanua, ona o le 'ele'ele o la e tanu ai le fanua o lou tinā faapea ai lou pute. O molimau olā ia o le tofi, o le faasinomaga ma le tua'oi.

Ma o le ala fo'i lea ua maualafia ai na fai atu sa'u upu i leni taeao faitauina, aua e ui ina 'ese'ese faigamālō, ae ua lē avea lenā e vaevaeina ai le tofi, le faasinomaga ma le tua'oi o tagata Samoa. Pei ona fai mai le 'au matutua, o lau o la'u, o lou o lo'u, ona e tasi le 'afu'afu e āfua mai ai, tasi le gagana, tasi le tofi, tasi le faasinomaga. Auā o Samoa e mai Saua se'i pa'ia Analega.

Sa ou asiasi i le mau tuufaasolo a mātua, i le tapu e puipui ai le tua'oi o le tofi ma le faasinomaga. Fai mai mātua, "e le laa le uto i le maene, e le sopo fo'i le sami i le lau'ele'ele".

O le faafitauli aupito sili lea o loo feagai nei ma aiga, malo ma ekalesia, o le sopotua'oi. Ua sopotua'oi fanau i mātua, ua sopotua'oi le puletua i le pule, ua sopotua'oi le tagata i le Atua.

O le uiga o le upu "mala matuā" o le malaia e maua mai le fetuu a mātua. O se tasi o mau faavae o le aganuu a Samoa, o le manuia e maua mai le faamanuiaga a mātua. Ma a maua leni faamanuiaga, e faasolo atu sosia o lena faamanuiaga i aiga, nuu, malo ma ekalesia.

E ao fo'i ona aafia i le sopotua'oi le lape o mātua. O loo faamaumauina i fuainumera a le Malo le sauāina e tamā o tinā ma fanau. Le afaina o fanau i le tuulafoa'i ma le tuufau e mātua.

O se molimau malosi o le solo o le falute, o faamaumauga a le Facebook – ua leai se vafealoaloa'i ma ua leai se tapu o le tua'oi.

E fia fai se tala i le molimau a mātua i le tua'oi e tapu ma mana. O le faatau i le lauga i le va o Pāsia o Safotulafai ma Lofipō o Sale'aula i le vaitau o le Mau ina ua lafo le lauga iā Pule (Savaii). Na amata mea Lofipo i le faapea atu, "Sia, lauga oe". Tali mai Pasia, "Po, lauga oe". Ona faapenā lava



Le Afioga Tui Atua. Tupua Tamasese Efi. O se tasi o toe ulutaia o upufai a Samoa tuto'atasi, le aganuu ma le gagana. Sa avea ma ao o le malo, ta'ita'i o le malo i le tofi palemia, minisita, iloga foi le tautua i le itu i a'oga.

lea ona fealoaloa'i se'ia oo ina malie mai Pasia na te faia le lauga. Faatusatusa le faaaloalo lea ma le gagana lea ua fai ai le faatau i nei onapō.

Ua sopotua'oi le tagata i le Atua

E mātua iseā le mala lea ua tula'i mai i le si'osi'omaga? E mātua ona ua sopo tagata i le matafaioi a le Atua. O le Atua o le āfuamea. O Lē na faia le lagi ma le lalolagi. O le lalolagi o lana meaalofa i tagata. O le meaalofa na aumai e faaogā tatau mo le manuia o tagata, ae le'i aumaia e faataugā ma faainaelo i ai talu ai le tu'inanau ma le faumālō. Auā ua avea leni soonafai ma le faumālō, ua matuā afaina ai le tau.

Ma ua valo'ia e saienisi, afai e lē fo'ia le faafitauli o le tau, e au ina fano le lalolagi.

O tapu sa puipui ai le vafeagai ai o le Atua ma tagata i le tatou gagana lauga, tatou te tautala soo i sa o Manuvao. O Manuvao o le Atua o le vao. E ao i le tagata e oia le vao pe ta le laau ona mua'i fai le taulaga i sa o Manuvao. Ua lē toe faia lea taulaga.

A o se tasi lea o molimau e lē se Atua le tagata; o le tagata ua na o se tausimea o le meaalofa a le Atua i tagata, o le lalolagi lea.

O le molimau o le faatalatalanoaga a le Atua ma le tagata, e te maua mai lea i le a'e o le palolo. E faitau e tagata ia aga a le masina, e ta'u mai ai le vaitau e a'e ai le palolo. A oo ina ta palolo, e lagi le sula "Fanau mai! Fanau mai!" O lona uiga e ta'u mai e 'upu o le sula, o loo latou iloa o loo a'e le palolo ma tuufua.

O lea ua faamaonia e saienisi le a'e o le palolo ma le tuufua. A o le fesili, faapefea ona iloa e tagata Samoa talanoa i le masina ona iloa ai lea o le vaitau e a'e ai le palolo?

Faaauau itulau e 4

"mafaufauga o le vaiaso"

Aua le fesili poo le a se mea a lou atunuu e fai mo oe, ae fesili poo le a sau mea e fai mo lou atunuu. John F Kennedy. Ta'ita'i Amerika

Faasoa o le Vaiaso: Tui Atua

Faapefea ona iloa e tagata o lea e tuufua le palolo? E māfua ona sa malupuipua tua'oi o le faatalatalanoaga i le va o le Atua ma o tatou mātua.

Ola ma le Oti

O se tasi o tima'i malosi a mātua i fanau, ia e iloa ola ma ia e iloa oti. O se tasi o faailoilo o le tua'oi o le ola ma le oti, e te maua mai i upu ma tāga o sula o maliu. E 'ave le faamuamua i le ola aua o la e fai mai ia upu ma taga o le sula, "Le Atua, ua e 'ave le tagata ae lē afaina auā e mafai fo'i ona ou fau le isi tagata". O lona uiga ia tatou ave le mua i le ola.

Fai mai se tasi tamā sa na ia faafailele a'u, le tōfā ia Soifuā Nese, o aso anamua, a oo ina ua malomaloā le soifua o se tagata iloga o le nuu, ona fale'esea lea ma tofia tagata faapitoa e o e tausi le gasegase i le fale'esea.

E māfua ina ia puipua mea ane ua afaina le mana. Ina ne'i mea ane e tūgā le gasegase ma aliali mai ai ni mea e ono faalumaluma tagata. O le agaga ia taofiofi se mea faapea e tula'i mai i totonu o le lotoifale o le aiga – 'aua ne'i pua'ina i fafo.

A e oo fo'i i le tagata gasegase e i ai lana fe'au tāua, o le a'oa'oina lea o ē

tausia lona gasegase i aga ma amio e faafeiloa'i ai le oti. Ma maua ai fo'i ma le avanoa e faamatala ai e le gasegase le tofi, le faasinomaga, le tua'oi i le 'au gāsese ma le au tausi ma'i. E fā'i la o le mau, a o lou olaina o le mau.

Ina ua lamalama faai'u le soifua o le toeaina o Soifuā Nese, ona faatonu lea o tama e fau lona pusaoti. Ina ua mae'a ona avatu lea o lona pusaoti ua tuu i luga o le laulau i le ogatotonu o le fale. A alu ane lava le tagata i le auala e fia talanoa i ai Soifuā ona valaau lea "afe mai se'i fai se ta ti pe afe mai e taumafa se sua o le aoauli."

A mae'a ona fai atu lea o le toeaina. "Sau la ta o se'i o ta matamata i lo'u pusaoti." Ona o atu lea faamatamata ma fesilisili mai, "e ā, e manaia lo'u pusa?" A uma lenā, ona nofo lea ua tatala le pusa. Ona oso lea i totonu ma ta'oto ai ma fai mai. "O le ā sau vaai mai, e matuā fetau lelei si tama ma le pusa; e tautamalii le tama, a ea?"

O le fesili, o le ā le fe'au lea e momoli mai? O le fe'au muamua, ua ou sauniuni e faafeiloa'i le oti. E lē o se mea e amo pe fata auā o le oti o le 'avefe'au a le Alii, e ao ona tatou talia ma le to'afilemu ma le faaaloalo. O le uiga tonu lea o le tima'i a mātua, ia e iloa ola ma ia e iloa oti.

Na tuai ona maliu le toeaina, ae ina

ua valaau le Atua ia te ia, ua soo ia itu e fa o Samoa i le tala'ave i le faaafefe a Soifuā Nese le tamaloa Falealupo.

FAAIUGA:

Ua lamalama faai'u le lauga. O le a taualuga le faasoa i upusii o le Salamo. "Ierusalem e, afai e galo oe ia te a'u, Ia galo lava i lo'u lima taumatau; Afai ou te lē manatua oe, Ia pipii a'e lo'u laulaufaiva i lo'u gutu, Pe a lē faasili Ierusalem a i mea uma ou te fiafia i ai."

O le ute ma le aano o le atunuu ma le malo o Samoa, o le tofi, o le faasinomaga, o le gagana, o le tu ma le aga ma le tua'oi.

Afai e galo le tofi, le faasinomaga, le tu ma le aga, ia galo lava i lo'u lima taumatau Afai e galo le gagana, le tala faasolopito ma le tua'oi, ia pipii a'e lo'u laulaufaiva i lo'u gutu, pe a lē faasili Samoa i mea uma ou te fiafia i ai.

Lau afioga a le alii Kovana, i lau tusi valaau, o loo e moomia se faasinoala mo tupulaga i le aga'i atu i luma.

Ma le faaaloalo, o la'u faasoa lenā mo sou alo ma sa'u fanau.

Ia manuia le faamanatuina o le Sisigafu'a a le malo o Amelika Samoa!

O lenei lauga a Tui Atua sa fofogaina i le fu'a a Tutuila ma Manu'a i le tausaga ua mavae.

O nisi o suiga i le su'ega NCEA mo le silafia e matua

O nisi o suiga sa tālia e a'oga e faatatau i su'ega o le NCEA ua fa'aalia mai nei mo le silafia e le mamalu lautele.

Muamua o le a le toe faia ni su'ega faai'u mo le tusipasi 1, peita'i o le a fa'aauau pea ona fai su'esu'ega i totonu o a'oga (internals), e ave ai le faamua i le literasi o le faitau ma le numerā. E faaopopo i ai se poroketi e filifili e le fanau lava ia i lalo o le vaavaaiga a le faia'oga.

I lea suiga o le a faaititia ai le numerā o togi mai le 80 sa iai i le na o le 40 e mana'omia.

O le a suia foi le su'ega numerā 2 ma le 3 i se fuafuaga fou e faapenei lona faiga. Mai le 80 togi e fia maua i le tausaga a'oga, e 20 o le a su'eina mai i se kosi o se matata eseese, se poroketi su'esu'e poo se poroketi faapitoa e faia i totonu o se aai poo se vasega o tagata.

O nei toefuata'iga ua fuafuaina tonu mo le sini o le tapenaina lelei o fanau e tusa ma suiga o le taimi.

Muamua o le sootaga o le a'oga ma le sauni atu e ulufale i se olaga



faigaluega. E moomia ona mautu le literasi i le faitau ma le tusitusi ae faapea foi i le numerā. E tele foi le avanoa e maua ai se galuega pe afai e tilotilo ane le galuega ua iai ni tomā i se galuega sa faata'ita'i ai a o iai i le a'oga.

O le tasi vaega taua o suiga o le tuuavanoa lea o a'oga i le fanau e saili ai e i latou lava lo latou ala i luma. O

se suiga lelei lea mai le tulaga masani e foliga e limata'ita'iina e le malo ma a'oga.

O nisi o faaopopo taua e iai le faamauina lelei o ausiga i tusipasi, e pei o na i taaloga ma mea e ta'u ai le a'oga, e pei o tomā maua mai i le Polyfest ma aga uma faapena. O le a manino mai se taimi e faamamalu ai.

O lou tala Samoa:**1962-2018**

1962
Toe maua mai le saolotoga o Samoa, faavae le malo fou tutoatasi o Samoa (i Sisifo). Saini le feagaiga faauo va o Niu Sila ma Samoa

1965
Aafia atina'e i le lausului ma le laufetiitii

1966
Osofa'ia Samoa e se afa malosi, 10 maliliu ai

1967
Avea Dr Fanafi ma ulua'i faatonu Samoa o a'oga Se isi afa puupuu na toe osofaia Samoa. Taunuu 'pisikoa'. Sui le seleni ma le pauni i le tala ma sene

1970
Palemia Tupua Tamasese Lealofi le IV. Amata le kuota mo e fia ulufale i Niu Sila

1971
Maua e Samoa auro mai taaloga a le Pasefika

1972
Uluai fono a le palemene i le Fale Fono fou

1975
Tuumalo Mataafa Fiamē. Sui Tupua Tamasese

1976
Palota. Palemia Tupuola Efi. Uluai taamilosaga Lakapi Samoa i Niu Sila; 7 faia'ina 1 le malo. Amata le Dawn Raids i Niu Sila i tagata Pasefika

1977
Toe amata le faiga faapulenuu e lagolagoina atina'e i nuu ma itumalo

1978
Faavae nusipepa Samoa Observer

1979
Faavae le vaega faaupufai HRPP

1980
Vaeluaina le EFKS i Samoa e lua

1981
Solo tetee le PSA mo se siitaga o totogi

1982
Palota. Tofia Vaai Kolone palemia. Soloia lona tofi faipule ma soloia ai le tofi palemia. Tofia e le ao o le malo Tupuola Efi ma palemia. Aumai iuga Lonetona i le mataupu ia Falemai Lesa ma le sitiseni.

1984
Faavae le iunivesite aoao a Samoa

1985
Palota. Palemia Tofilau. Faavae le soofaatasi a Vaai ma Tupuola e suia le malo

1987
Faia'ina malo o Vaai suia e Tofilau ma lana vaega

1988
Palota. Tumalo le HRPP

1990
Osofa'i le afa o Ofa

1991
Osofa'i le afa o Valelia. Palota le 21

1992
Osofa'ia le atina'e talo e le lega

1999
Maliu Tofilau Eti. Palemia Tuilaepa. Tagatavaleina Luagalau, molia ni minisita se to'alua

2001
Tuumalo Vaai Kolone. Pisa mataupu tusifolau

2007
Tuumalo Malietoa Tanumafili le 2. Tofia Tui Atua Tupua Tamasese ma ao fou

2009
Osofa'ia Samoa e se galulolo malosi, 189 maliliu

2017
Tofia Tuimalealiifano Vaaletoa ma ao fou

2018
Laga'i Mataupu i lafoga a faifeau ma fanua e lisi atu.

Faasoa faapoopo: Aneta Matagi**Tulitumatagau le ufi a Sina: o le naunauga mo le siitia o tomiai**

E muamua ona ou fa'atulou i ou pai'a Samoa, o pai'a apoapo gata, mai Malaetele na maape ai tofiga seia paia Analega, na tauiso ma tauilo ai malo. E fa'atulou foi i le nofo tatalo a le au failotu i soo se fata faitaulaga i ona tulaga mamalu, o sui vaaia o le Atua i le lalolagi, o loo nono manu aua se manuia mo alo o Samoa mo a taeao.

Ae o le a fanatonu le malama ma vili tonu le ifi a Maina ma talatuavalu lau o le fo e ala i le fa'asoa a le auauna.

O le alagaupu Fa'asamoa e masani ai tatou, "Tulituli matagau le ufi a le tama'itai o Sina". E tau faapena se ata fa'alemafaufau e fa'aautu i ai se manatu vaivai o le auauna.

O loo tulimata'i pea se taunuuga manuia o le tausinioga o feagai ai i tulaga o le fa'alauteleina o le malamalama i a'oa'oga. O le taimi nei o loo tau fa'amae'aina lo'u taumafai i lenei vaega o le tausaga e ala i le su'esu'eina o le pepa i le Univesite o Canterbury (University of Canterbury).

O le igoa o lenei pepa e taua o le Issues in Language Acquisition and Learning po o le Mataupu e fa'atauaina ai le a'oa'oina o Gagana.

O lo'u manatu vaivai i lenei pepa, o le fa'atauaina o le gagana muamua a le tamaititi.


E i ai foi lo'u talitonuga, a lelei ma malosi le gagana muamua a le tamaititi, o le a sili atu ona lelei lona a'oa'oina o lana gagana lona lua.

O alo ma fanau a si o tatou atunuu o loo taumafai lava ina ia lelei la latou gagana lona lua po o le Igilisi (English) ina ia pasi ai a latou mataupu uma o loo a'oa'oina i totonu o aoga.

Atonu o le mau lea o loo i ai talitonuga o le tele o tatou matua, ae o la'u fa'amanatu ma se tu'uualalo, ia tatou taumafai ia u'unai pea ma la tatou gagana i alo ma fanau ina o latou malamalama atili ai i le taua o la tatou Gagana Samoa, o le tatou mealofoa mai le Atua.

O se tasi o a tatou measina ma so tatou matupalapala na toina mai e lo tatou Tama o i le lagi tatou te tausii ma fa'apelepele i ai.

O le manatu o le tele o le au



su'esu'e i lenei pepa, ia fa'ataua lava le gagana muamua, ia fa'amausali ma fa'amautu i totonu o aiga, nuu ma ekalesia ina ia mau'aa i loto ma mafaufau o le fanau, e tusa lava pe soifua ma ola i atunuu ese, ae ia manatua lona fa'asinomaga ma lona si'osi'omaga na ola ma soifua a'e ai.

E susu'e lava le fa'amalama ma toe tepa i lona tofi e ala lea i le fa'ataua o lana gagana ma lana aganu'u.


E i ai le fa'amoemoe a mae'a lenei pepa i lenei tausaga, ona fa'auma ai lea o a'u su'esu'ega ina ua atoa i ai le ono o pepa e mafai ai ona maua le fa'aailoga ua ta'ua o le Master of Education (Med).

Ae fa'amoemoe pea i le fesoasoani mai o le agaga o le Atua na te aumaia le fa'ataunuuina o nei moemitiga i lona alofa ma lona fa'atasi mai i le auauna fa'atauavaa.

Ae fa'afetai lava mo lenei avanoa matagofie ua mafai ai ona fa'asoa atu ai i le paia ma le mamalu o e o loo fiafia pea e faitau i lenei puletini e logo puialii ai foi si o tatou atunu'u i mea o loo tutupu i lo tatou aai nei o Kalaietete.

O lo'u igoa o Aneta Matagi mai le afioaga o Pu'apu'a, Fa'asaleleaga i le motu tele o Savai'i.

Fa'asoifuaina ma ia manuia tapuaiga malu a si o tatou atunu'u.



ME 27-IUNI 2

27

1915 Tatala se lala a le faletupe BNZ i Apia

2000 Taunuu le Small Manu i Niu Sila

2002 Talimalo Samoa i le Kirikiti Peretania Pasefika

2009 Fusuaga muamua a SBW, malo ia Garry Gurr

29

1841 Malaga asiasi Misi Mare i motu Melanesia ma ni faia'oga se to'afitu

2000 Taunuu aloiafi taaloga Olimipeka i Faleolo

30

1894 Taua va o Aana-Atua ma le malo Malietoa

1906 Ulufale Frank Solomon i le Olopeleki a Niu Sila

1973 Uluai faatinoga koneseti Jesus Christ Superstar i Apia

31

1972 Tatala falefono fou a Samoa i Ti'afau

1 IUNI

1948 Usuia ulua'i fono faitulafono, sisi ai ma le fu'a fou

1962 Faailoga le ulua'i tuto'atasi o Samoa

2 IUNI

1836 Taunuu ulua'i misionare LMS i Tutuila; Misi Mare, Misi Panatene, ma isi

1924 Ulua'i taaloga va o Apia ma Fagatogo, malo Apia 33-0

1927 Taunuu i Apia minisita NS William Nosworthy

2001 Malo Manu Samoa ia Toga, 20-18, i le Apia Park



A

mulimuli i faamaumauga a Te'o Tuvale e iloa ai le tulaga ese o le tausaga 1894 i le talafaasolo o Samoa. O loo tu malo Malietoa, lagolagoina e Peretania ma Siamani. Ua faatafea

Mataafa, ae le uma ai faafitauli o le malo. O iai isi fili i le soofaatasi a Atua ma Aana ua sagai tau nei ma le malo. Aso 29 o Ianuari na folafola ai se faasalaga faitasi mo Aana atoa, ae folafola le taua i le aso 30. Aulia Mati ua amata ona fesaua'i auupega; Aana e tali atu i tafa e lua: muamua le fili tulata (Tuamasaga ma le fitafita a le malo), lua, o 'au mai Salafai e lagolagoina le malo. Aulia Iuni ua auai foi Manono e lagolago le malo. O nisi o osofaiga a Aana na mamafa i tuaoi e iai Saleimoa, na iloga ona faatama'ia fale ma faato'aga. I le amataga o Aukuso na amata ai ona tu'i e manua Peretania ma Siamani le 'olo o le fili i Luatuanuu, ma faapea ona tuumuli ai 'au a Atua, ona faasolo atu lea o le osofaiga i Lufilufi, amata le tu'iga e manua i le aso 12 e aulia le isi aso. A o le aso 14 na pulumisa ai se misionare Metotisi ma goga ai le taua. Molimau Tuvale na taofia e le malo ni fana e silia i se 100 mai le fili, ina ua faalelei itu e lua.

Na toe taliu atu 'au a le malo i Aana ma le faamoemoe e a'ea le 'olo o Mafafa. Na mafai foi ona taofia le fili ma toese mai ni auupega o fana mai ia i latou. Ae e lei utu ai le tetee i le malo. I le 1895 na fono ai Tumua ma nisi o pule mai Salafai i Lufilufi, ma autasi e fa'aauau pea le tetee i le malo. O lea tete'e na taualuga i le toe faavaeina o sana pulega malo i Leulumoega. Na toe foi mai le tafeaga a Mataafa Iosefo i le 1898, ma toe amata le vevesi, e iai le taua o le Aso Tasi i le 1899. I le suiga ua iai nei, Siamani e lagolago Mataafa, a o Amerika ma Peretania e lagolago le malo o Malietoa. O le iuga, o le vaelua o Samoa ia Siamani ma Amerika.

Me i le Tala Faasolo o Niu Sila



29 Me 1905. Mua Niu Sila i le lalolagi i le fausia o se falema'i mo failele ma pepe e togafiti ma tausai ai

30 Me 1901. Teena e Niu Sila le avea'i e avea ma se tasi setete o Ausetalia

1 Iuni 1960. Maimoa Niu Sila i se TV mo le taimi muamua. Faasalalau mai i le Shortland Street Aukilani

NIUPAC PUBLICATION

Email: evaleon.books@gmail.com

Phone: (03) 382-6674

Postal: 39 Basingstoke Street, Aranui, Christchurch 8061

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editor:

Levi Tavita, MPS, BTheol, BA, Grad Dip Tchg
ltavita8@gmail.com

Reporters:

Saili Aukuso, MA, BEd, DipTESL, DipTchg
saili.niupac@gmail.com

Vavao Fetui, MA, BEd, DipTESL, DipTchg
ola.niupac@gmail.com

Photographer: Fili Fuaava

EVALEON BOOKS & NIUPAC PUBLISHING


Telefoni (03) 382-6674. Tuatusi meliE: evaleon.books@gmail.com



Sponsors:


Evaleon Books & Niupac Publishing

Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures). E tautua fo'i i le fa'aliliuga o gagana, ma le tapenaina o ni tusi e fia lomina i so'o se sionara o fatuga.



TAALOGA PASO SAMOA ~ GAGANA E LUA

1. Faatumu le pusa i upu/igoa Samoa poo se tasi e faatonuina. Fill the grid with the Samoan equivalents or any other as directed.



LPSTavita 2018 Copyright


ACROSS

- 1. investigate (6)
- 4. power (4)
- 8. to cover (4)
- 9. A Samoan 'wormy' delicacy 6
- 11. son (6)
- 12. a type of chair (4)
- 14. bang (2)
- 15. India (6)
- 19. held (4)
- 22. rain (2)
- 24. parent (5)
- 27. rise and up early (5)
- 28. pie (3)
- 29. nest (5)
- 30. be fortunate (5)
- 12. any of your (3)
- 13. banana (3)
- 16. Noah (3)
- 17. tidy up (3)
- 18. me (2)
- 20. firm, solid (5)
- 21. fix date (5)
- 23. school of fish (4)
- 24. by chance (3)
- 25. hero (3)
- 26. can, tin (3)


DOWN

- 1. Germany in Samoan (7)
- 2. England in Samoan (7)
- 3. be smelly (2)
- 5. Apollo in Samoan (5)
- 6. fourth day (3,2)
- 7. straight (3)
- 10. busy (4)

Tusi e fesoasoani:



Solution ~ Tali



Lauafatu Samoa: Tala mo tamaiti mai le tusitala o Isopo (Aesop)

E tali mai le agalelei

O LE LEONA MA LE IOLE



O loo ta'oto'oto lava le leona o Simo ma tulemoe. Ua uma lana mea'ai o le aso. Ae te'i lava ua na lagona

atu se mea e gasē, o se iole laitiiti e oso ane i ona autafa. Faapea lava ia o loo moe le leona, ae leai. Ua te'i lava si iole i le fa'alogo atu ua mau le 'u'u a le leona i lona ua. Ua si'i a'e nei i ona luma ma tilotilo i ai.

“E te ulavale, e te iloa oe o a'u o le tupu o le vaomatua?” o le upu lea a Simo le leona.

“Malie lou finagalo, fa'aola 'ita fa'amolemole. Atonu e iai se aso ou te tauia ai lou agalelei,” o le tagi lea a le iole.

Ua 'ata leotele le leona ma mafaufau. E fa'apefea ona fesoasoani lenei tama'i iole ia te a'u. O le a se mea na te mafai! A o ia o se tupu alofa, na te le 'aia fo'i se tama'i iole, ona ia tu'u atu lea o le iole e alu.

E lua ni vaiaso e va ai, ae tupu le faalavelave i le leona. Ua lavelavea i le upega a le 'autulimanu. Ua fiu e autafiti e fia sola ese ae le mafai. E malosi tele le upega. Ua i'u lava ina ta'oto ifo ua vaivai.

Na fa'alogo le iole i ana uo e iai le leona ua mau i le upega. Ua mafaufau pe le o le leona lea na la fai tala. Ua alu nei loa e va'ai.

E sa'o lava, o Simo. Talofa e! E le'i toe fa'atali, ua fa'asaga atu loa ma 'ati pito o maea o lo'o taofia le upega. E le faigofie lana galuega, a ua fai ma le to'aga ona o lana upu sa fai i le leona. Ua mae'a lana galuega, ua toe sa'oloto le leona. O le i'uga lena o le tala tamaiti. Alofa atu nei, alofa mai taeao. Tatou te manatua le agalelei o isi. E manatua fo'i e i latou lo tatou alofa, ma toe tau mai i le alofa.

E maumau alofa

O LE ALOPE MA LE MATU'U



Ua 'ai fa'aatuatuvale le alope ua laoa ai ma mau se ponaivi i lona fa'a'i. Ua uma ana faiga e tau aumai ai i fafo le ponaivi e le mafai. Ona alu lea e su'e le matu'u e nofo i le taufusi e le mamao.

“Si a'u uo e Matu'u, alofa mai i lo'u mafatia. O le ponaivi o loo mau i lo'u fa'a'i. Ua le mafai ai ona ou toe 'ai, e i'u ina ou oti ai. Alofa mai fa'amolemole.”

Na fa'amaga nei ae fa'aaoga e le matu'u lona gutu umi e se'i mai ai i fafo le ponaivi. Ua fiafia lava le alope, ua soso'o fa'afetai i luga o isi fa'afetai. Ae na sui fa'afuase'i lana pupula ina ua fa'apea mai le matu'u, “A o le a la se mea e te aumai mo a'u, o lea ua ou agalelei ia te oe?”

Ua tilotilo le alope i le matu'u ma lūlū lona ulu, ma fa'apea lana upu, “O la'u meaalofa ia te oe o lou ola. Manatua le taimi na ou fa'amaga ai a o lou ulu atoa lea sa i o'u vainifo. Fiafia la'ia, o lena e te ola.”

E moni le upu, e te le sa'ilia sou tau i se e leaga e pei o le alope. E pei o le upu a Samoa e maumau alofa. Afai lava e le alofa, e le alofa.



PASI ATU LA TATOU PULETINI I LE TOU A'OGA, AIGA, LOU TUAOI, AU UO, E AOGĀ MO LE FANAU A'OGA



Igoa: John Fitzgerald Kennedy
Aso Fanau: 29 Me 1917
Ausiga: peresitene 35 o le malo tele o Amerika
Fetu: Timini

O le tala o le peresitene lona 35 a Amerika ua lauvivilu ai fanau a'oga a lea atunuu, aua o ia se tasi o ta'ita'i logologoa lona suafa. Soifua a'e i se aiga maumea ma tulaga lelei, na avanoa JFK i a'oga lelei ma faamanuiaga e le maua uma e le tele o fanau. Ae na o faatasi lena ma le agaga tausili o matua ia avea le fanau ma ni ta'ita'i iloga o le malo. E mafua ai se pulega maopopo pe malosi foi, faamatua i fanau e tapena ai mo sea faamoemoe. E iai le tula'i mai o John poo Jack, ma isi uso e to'alu na sosoo mai ai. Ua silafia le tala ma le iuga faanoanoa o i latou uma. E manatua e Amerika JFK i lana faaaliga o le a'ea e lona malo o le tafailagi mamao, e iai le ausiga mata'ina i le masina. O lana polokalame faavaomalo e auina atu ai ana talavou o ni amepasa o le filemu ua soo ai le lalolagi ma manuia ai le to'atele. Ae iloga foi sona molimau i le tala o Amerika i le faaleleia o le tulaga o tagata lautele, o se faatusa o le ta'ita'i talavou lototele. O ia foi o se failauga lelei e ola ana upu. E iai lenei, O le suiga, o se tulafono o le ola. O i latou e tilotilo i le na o tua ma nei e iu ina misi ia i latou le aga i luma. Ma lenei, E masii uma vaa pe a sua le tai. O loo olaola pea manatuaga o JFK i ona tagata.

ATI A'E UPU:
vailau (nauna) o se vaeluaga tusa'o i se laupepa poo se tusi. 2. o se tusitusiga e fai i sea avanoa i se nusipepa. Igilisi—column.
matālau (nauna) o se tasi o vaega atoa o se tusi, e masani ona faailo i se numera poo se autu. Igilisi—chapter.
itulau (nauna) o se lau o se tusi poo se api. Igilisi—page, leaf

Tulimanu o Pola:

Tauvaga a le fanau ma nai tuualalo



Mua ia le faafetai i le Tamā i le Lagi e ala i le faasoa limalelei a lana Afioaga le Tamaaiga.

E maeu lava upu o le lotonuu faaIsaraelu, e le pine le pupu'e o le lagona ina ua faato'a tofo i le leaga o le puleesea ma faoa le tofi e tagata ese. Ua tagi ai le fatu i upu e gata ai le lagona ootia. E le o le gagana Papelonia, o le gagana a le nuu moni.

E tau soo la'u faitau i le fuaitau, 'ia galo lava i lo'u lima taumatau? O la'u fesili, e galo le a? Faato'a ou matua nei ma iloa ai e foliga e le o atoa le faaliliuga faaSamoa. E autasi lomiga Peretania i le mea e galo e le lima taumatau, o lona poto poo lona tomai. Ia galo lava i lo'u lima taumatau lona tomai. Ia, tailo i le afaaliliu pe o se mea na fuafua pe leai foi.

O lenei ua tatou oo mai foi i le vaitau o tauvaga lauga a le FAGASA, e pa'u'u faatasi ma lena a le SpacPacific a Kalaiesetete. Sa ou matamata ai i le tauvaga a le Spac i le vaiaso ua sola. A o loo sauni atu foi le FAGASA i ana tauvaga faaitumalo ma le aoao i se taimi o i luma.

Ia, e le faigofie i nai fanau ona faasoasoa lagona, e fai o le tau mafaufau i upu o le tautalaga, a o le atu i le tapuaiga pe maua se 'ai. Tatou te le iloa pe foi atu i le fale avane i ai se faamalo a matua pe lau le faatamala. Tulaga pe leai, ae tatau ona faamalo i ai i lona toa ma le agaga taumafai e atia'e lana Samoa.

O taimi foi o le fetalitonua'i; e avatu ai e fanau tauva lo latou faatuatuaga 100 pasene i e o le a togiina le tauvaga. Auā a faoa le 'ai o se tasi o le fanau ona o le le faamaoni, o se faanoanoaga sili lea. Afai e sala le faamasino i le faatamala, e iai le faanoi, ae afai e sala ona ua faimea faapito, o se afaina tuga lea e faamanu'alia ai le agaga o tauvaga, aemaise fanau ma le tapuaiga a matua. Ae le ta'ua le aitu o le aoa o loo faamalumu ifo. O moomooga alofa, ia malu le fanau i ona itu uma, la lea e taua faamasino ma e fesoasoani i ai.

Talanoa pea i tauvaga, ua le o toe lilo se po i le tusi e matua po o se tei matua o le lauga a le tama poo le teine tauva. Poo le faia'oga foi. O aga lava na ua tatou alu ai, e le fia mamā se isi.

Pau lea, talosia e vave mai le aso e tusi ai e fanau a latou lava lauga, ma lagona e i latou o latou lava leo, ae le o le leo o Iakopo matua ia Esau laititi. O le iuga, e talanoa mai Iakopo i Samoa ma aso ua alu, a o Esau e nofo i Niu Sila. Fai mai le nanu a le isi toeaina, e taua le konset; ia, ua tau lata ane lava i ai.

A ia manuia lava le vaiaso o le gagana.

